



Bentiarq Ottosen
Atassut

UKA 2024/22
2. Oktober 2024

Siunnersuut uunga: Kalaallit Nunaannut suliffissarsiortut killilersimaarnissaat pillugu Inatsisartut inatsisaata allanngortinnissaa pillugu Inatsisartut inatsisaat (Inuit immikkut ittumik Kalaallit Nunaannut attuumassuteqartutut isigineqarsinnaanissaannut tunngatillugu piunasaqaatinik allanngineq)

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

Siullermeenera

Siullertut oqaatigineqarsinnaavoq, ukiuni tullerni assaat sulisinnaasut amigaatigineqalertussaapput. Naak ukiuni kingullerni suliffissaaleqineq appariartoraluartoq, suliffeqarfiit namminersorlutik ingerlatsisuusut sumiiffinni ataasiakkaani sulisinnaasunik amigaateqalertussaapput. Assersuutigilaarlara Avannaata Kommuneani assaat sulisinnaasut sanaartorerup iluani 600-rujut amigaatigineqalertussaapput, ukiunilu tulluittuni naatsersuutigineqarpoq suli amerlanerusut amigaatigineqalertussaallutik. Tamattutaaarli aamma ippoq Peqqinnissaqarfimmi sulisussarsiortarnitsinni ajornartorsiutit sulisoqarniarnitsinnut tunngasut.

Ajornartorsiutit assigiinngitsorpassuit qaqileqattaangikkaluarlugit oqaluttuurtutulli maani oqaluunangikkaluarluni timitaliinissaq pingaaruteqartoq ersersittariaqarparput. Isummanik qaffakaatitsinissaq pingaaruteqarpoq, tamannalu ilisarnaatigilluartakkatta ilagaat maani nunatsinni kikkulluuniit tikilluaqqullugit Kalaaleqatitulli pillugit inooqataalernissaat, taamaalioruttami inuup kiffaangissusaa innarlernagu peqatigilertussaagatsigu.

Sulisut allallu sulisinnaasut avataaneersut tikilluaqqusariaqarpagut, aningaasaq inuiaqatigiinni assakaatinniarlugu kaaviaartinneqartariaqarpoq. Qulakkeerumallugu inuiaqatigiit akornanni sulisut amigaatigineqartut inoqarfinni annerni aamma inoqarfinni minnerni ineriartortitseqataanissaat. Puigorneqassanngilarli Atassummiit uppersarsartuarparput inuk Kalaallit Nunaannut attuumassutilik salliunneqartussaannera, tamannami aamma inatsisitigut naqissuserneqareernikuuvoq.

Tamatuminngalu politikkikkut oqallittarneq inuiaqatigiinnut paatsoorsaarintut isigalugu pissusissamisuungitsoq Atassummiit tikkuartortariaqarparput, isumaqarattami inuiaqatigiit akornanni pingaarnerpaajusoq Inuk qitiutillugu kiffartuusineq. Erseqqissarusuppara Inuk kiffaangissuseqarpoq, kiffaangissusiiaanissaq politikkikkut toqqammaviliinngilaq, toqqammaviliisariaqarpugulli inuup atugarisai pillugit oqilisaasissalluta.



Kikkulluuniit Kalaallit Nunaani atorfissaqartippagut tikilluaqqusariaqarlugilli, tamanna aamma inissaminiippoq. Nunarsuarmut sumiluuniit qiviraangatta suliffeqarfissuit aamma namminersortut imminut pilersortut avataaneersunik sulisoqartarput, kikkunnulluuniit inuiassuarnut assortuussutaangitsunik. Kalaallit Nunaat taamatut qaammarsarneqartariaqalerpoq, nuna pisariaqartitsivissorpoq sulisoqarneq pillugu ineriartornissaminut.

Tamakkua uummateqarfigilluakkama ilagimmassuk, isumaqarpunga isumatusaartumik suliaqartoqarsinnaagaluartoq. Kalaallit Nunaanut attuumassutillit nunatta avataani linniarsimasut atorfissaqartitagut amerlaqaat. Ukiunilu tulliuttuni pisariaqartittussaallutigit qulaajarneqarnissaat Atassummiit Naalakkersuisunut erseqqissaajumavugut.

Taamatut oqaaseqarluta, Inuussutissalerinermut aatsitassanullu ataatsimiititaliamut suliareqqitassanngorlugu innersuupparput.